



### ○ Cunc dla dljia – informaziun dal consei d'aministrazion:

Desco enjunta ala plata ciafeise metüs fora por val' edemes i cunc dla dljia dal 2015. Düc pó ensciö odei ci che al é gnü trat ete y dé fora.

La ploania envieia ince eniann düc a mostré solidarité y a dé so **contribut por l'ativité dal 2016**. Al ven perié do en contribut de **30,00 € da düc chi co davagna o ciafa na pensiun**. Cösc pó gní paié tla banca:

Cassa Raiffeisen **IBAN IT 60 B 08010 58550 000305001820**,

Cassa dal Sparagn **IBAN IT 18 B 06045 58550 000005000568**.

An pó ince dé jö cösc contribut **en sabeda ai 20 y en domegna ai 21 de forá** do messa, te calogna bas ete.

**En bel iolan** al Comune de Mareo, al Teater d'La Pli, al Consorz dal'ega La Pli y samben a düc i atri co á daidé. En bel iolan y Dio s'al páii ince a ennom de chi co á ciafe les ofertes menades demez.



### 1 enformaziuns y termins

**Oraziun da Taizè:** la proscima oraziun de Taizè ven tignida en vendres ai 19 de forá ales 20:00 dla capela a Oies. Al se trata de en n'ora olá ch'al ven perié, medité y cianté en forma de Taizé. Düc é der bel enviés a tó pert.

**Sorvisc ai Jogn:** le SaJ chir jogn y jones co á ligreza da laoré con mituns y mitans desco animadus/esses pa "Isté deboriada". Por informaziuns ☎ 0474 523070 o info@jogn.org. Termo por dé jö les domandes é le 29 de forá 2016.

**Uniun Patrones Mareo:** en dedolönesc ai 23 de forá s'abinunse les 8 da sera sö dal ciamp dal sport a Rina a fá en bel rait a löna colma y sté en compagnia. Dötes é der bel enviades; prenotaziuns cina ai 17 de forá pa Verena ☎ 340 3455675 o Patrizia ☎ 334 1663776, o sot al grup WhatsApp.

**Zenter Families Mareo:** le ZFM met da jí n curs de passlunch por mituns dla scolina y dla pröma elementara con Linda, dedemesaledema ai 17 y 24 de forá y 2 y 9 merz, dales 15:30 ales 16:30. Informaziuns y prenotaziuns pa Linda ☎ 0474 501662 o 333 3517616 (domisdé y da sera); cost: oferta ledia.

**Portina por l'assistenza y la cura – por ci l'adori pa iö?** Le Club dai Seniores da San Martin y Antermeia envieia düc i interessés ala presentaziun dla portina nea por l'assistenza y la cura, vendres ai 19 de forá dales 14.00 te Raiun Sozial a Picolin. Trec é i aspec da tigní cunt can che an röa te na situaziun de debojügn de assistenza y feter degügn ne s'an capesc fora. Püc sa co organisé le guern, a che damané por ciafé n aiüt y/o ince a ci prestaziuns che an á le dert. En cösc domisdé ciafeis respostes, informaziuns y conseis.

**Döt le bun a:** Ottilia Ellecosta Gasser, Rina \* 17.02.1929  
y a düc chi co á santennom y compless i agn cöst'edema

**Impressum:** Ploania d'La Pli; redaziun Franz Rigo y Edith Willeit  
**Comunicaziuns cina al dedemesaledema** sera a Franz Rigo: ☎ 0474 500978 o ✉ ploania@gmx.net  
**Download plata:** www.unitepastorala.org o ince www.comun.mareo.bz.it



## Plata dla Ploania La Pli de Mareo Santa Maria dal Bun Consei

Ploan: **Signor Heinrich Perathoner**  
E-mail: **ploania@gmx.net**

Calogna Al Plan: **0474 501006**  
Radio de Ploania: **93,00 MHz**

UNITÉ PASTORALA



Ann C

14.02.2016 - Pröma domegna de Carsema

n. 12

## Ci á pa emportanza por la porsona?

☞ Deut 26, 4–10 | Rom 10, 8–13 | Lc 4, 1–13

### Dal Vangelo do San Lüca:

[...] <sup>3</sup>Danló ti á le malan dit: Sce t'es le Fi de Dio, spo dí che cösta pera deventes pan. <sup>4</sup>Gejú ti á respognü: Al sta tla Scritöra: Le chescian ne vir nia ma de pan. <sup>5</sup>Danló l'á le malan condüt sön n crep y ti á mostré te n momont düc i regns dla tera. <sup>6</sup>Y al ti á dit: Döta la potenza y la gloria de chisc regns ôi te dé; ciodich'ai m'é gnüs sorandés a me, y iu ti ai dá a chi ch'i ô. <sup>7</sup>Sce te te petes jö dan da me y te m'adoreies, sará döt to. <sup>8</sup>Gejú á respognü: Dan dal Signur, to Dio, desste t'enlené y sorví el su. <sup>9</sup>Sön chera l'á le malan condüt a lerusalem, l'á motü sö ensom le templ y ti á dit: Sce t'es le Fi de Dio, sciürete jö da atló; <sup>10</sup>ciodiche la Scritöra dij: Al comana sü angeli de ciaré de té <sup>11</sup>y: Ai te portará sön söes mans, por che to pé ne ciumpedes nia te na pera. <sup>12</sup>Sen ti á Gejú respognü: La Scritöra dij: Te ne desses nia meter le Signur, to Dio, ala proa. <sup>13</sup>Do cöstes tentaziuns s'an é le malan jü demez da d'el cina al tomp motü.

### I ponsun do

*Te nosta sozieté i vegnel fat ala porsona n gröm de propostes, i podun cherí fora danter tan de poscibilités. Cösc pó samben mené tla tontaziun da orei tres deplü y con l'orei tres deplü da se desmoncé l'esenzial. Tl'aspiraziun do tres deplü gnunse sbürlés iaica y i án tres manco tomp. La Carsema s'envieia a tó na dezijiun nea. Dla parora de Gejú y dla parora dla Sacra Scritöra ciafunse la racomandaziun de nia se desmoncé les cösses co cunta veramonter.*

### I periun

*Beldio, to Fi s'á motü daldöt a to sorvisc. Tal meterman dal tomp dla penitonza pascala te periunse: deidesse ince nos, ch'i tolunse la dezijiun por te y por töa parora. Láscesse odei ete, ci co é emportant por nosta vita. Por Crist, nosc Signur.*

do Wilhelm Egger "Sonntagsbibel"

☞ Letöres dla secunda domegna de Carsema:

Gen 15, 5–12.17–18 | Fil 3, 17 – 4,1 | Lc 9, 28b–36

Edema liturgica dai 14.02. ai 21.02.2016

<b>DOM 14.</b>	<b>Pröma domegna de Carsema domegna dla dlijia te ciasa</b>	<i>Ziril y Metode (Patrônns d'Europa), Valentin</i>
<b>08:30</b>	<b>gran messa</b> por döta la ploania	<i>oferta por i debojügnns dla ploania</i>
<b>► 19:00</b>	les ciampanes envieia al'oraziun te familia	
10 y 18	s.m. a Al Plan	
<b>Lön 15.</b>	<b>dé d'oraziun te familia</b>	<i>Sigfrid, Faustin</i>
<b>Ded 16.</b>	<b>funziun con Les Staziuns</b>	<i>Iuliana, Filipa</i>
<b>► 19:30</b>		
<b>Dem 17.</b>	<b>dé d'oraziun te familia</b>	<i>I set sanc fondadus dal ordinn dai Servic, Marzel</i>
<b>16:00</b>	al ven dit Les Staziuns te dlijia da Pliscia	
<b>Jöb 18.</b>	<b>funziun de Carsema</b>	<i>Simon, Constanzia, Angelico</i>
<b>19:30</b>		
<b>Ven 19.</b>	<b>dé d'oraziun te familia</b>	<i>Bonifaz, Irmgard – astinonza dla cern</i>
<b>Sab 20.</b>	<b>s.m. prefestia</b> por + Massimo Topran Cutin, La Pli	<i>Amata, Iordan</i>
18:00	s.m. prefestia a Al Plan	
<b>19:30</b>	<b>s.m. por vîs y +ti dla fam. Kehrer dal Tistler</b>	
<b>DOM 21.</b>	<b>Secunda domegna de Carsema</b>	<i>Pire Damiani, German, Tomesc, Robert</i>
<b>08:30</b>	<b>gran messa</b> por döta la ploania	<i>oferta por i debojügnns dla ploania</i>
10 y 18	s.m. a Al Plan	
<b>ampola:</b>	por fam. Adolf y Zilia Willeit, Laronz	
<b>ministronc:</b>	► da doman y domegna: Alan Ellecosta y Ivan Trebo ► da sera y domegna: Elisa Rigo y Anna Peslalz	
<b>i recordun:</b>	Paola Kehrer Moroder, Urtijej	+ 20.02.2015



Jiné con ...

**Jiné con i edli**

*ciaré deplü sôn me enstes:* ciari con responsabilité de mia vita? y dal tomp co m'é scinché? Mo conzedi datrai n iade ince val' de bun?

*ciaré deplü te me enstes:* ci sozedel pa te me, ci ponsiers, dejiders, sonns, ... âi pa? Va chisc a öna con mia vita?

**Jiné con les oredles**

*aldí deplü te me enstes:* ci mo interesseia pa? Ci mo plej pa, olá é pa mi interesc, mies cualités, ...? Ci mo dá pa ligreza? Porti ince ennant mi interesc, mies cualités? Por che o por ci âi pa oredla?

**Jiné con la bocia**

*meter averda a co ch'i mo comporti con les porsones enceria:* ci tonn adori pa con les porsones desvalies ch'i incunti? ci notes lasci pa ciamó aldí fora? Sunse bun de pronunzié parores da orei bun, da laldé zacai o da i ringrazié? Sunse sonzier con mi amisc? Dijj dagnora ma poa y amen, o diji mia minunga y sta ince pa chera?

**Jiné con les mans**

*mo comporté con responsabilité:* por ci mo dá pa da fá? Corespogn cöstes aziuns a mi prinzijs, o le feji ma deache d'atri s'al aspeta da me?

**Jiné con i pîsc**

*Pîsc mo porta:* che y ci mo porta pa te mia vita? Che y ci á pa gran emportanza por me? Pó la fede ester por me na corona co porta, n pilaster?

Sc'i sun bun da tó mia vita deplü te mies mans, da vire con responsabilité y de meter man danö danló olá ch'al é debojügn, pói sperimenté danö la Festa dla Pasca.

Pasca ven ensciö na festa: dal meterman danö, dal cambiamont, dla ressourceziun da na vita morta a na vita emplida!

Al n'é önn co mo dá te cösc tomp de **Carsema** la sügherté da creie ala **Pasca**, deache al sl'á vit dant: **Gejú Crist!**

da "Parores por vigni momënt"

**I Sacramonc cuntés ai mituns (4)**



Se sonté pa mesa con Chelbeldio

**L'Eucaristia**

Chelbeldio ô sté dlungia nos, plü dlungia co che na porsona pó ester – encer nos y te nos. Tal sacramont dl'Eucaristia sunse sontés con Gejú pa mesa: ci ch'al á dit dan da presc duimile agn a sü amisc ven present tla Santa Messa: "Cösc é mio corp y cösc é mio sanch." Pan y vin é segns de Gejú enstes, segns de söa vijinanza. Tal pan y tal vin sontiunse söa presenza.

"Eucaristia" o dí "dí iolan". I án trespes gaujes da dí iolan: por le soredl, la ciasa, la speisa, por i geniturs, i fredesc y les sorus, i compagns, por la sanité y por nosta vita. Nos ne viun nia susc, i ne cherdun nia da susc. Tl'Eucaristia festejunse nosta comunité con i atri cristiagn y con Chelbeldio, nosc Pere. Ara se ven scincada da so Fi Gejú, co é nosc fré. Ince a El orunse ti dí iolan.

La Pröma Comuniun é l'invit solenn de Gejú da se sonté pa mesa con El.